

Sambèchi na Skol

No ta nada strañu pa tende ku un alumno a agredí un dosente òf menasá otro alumno ku arma di kandela...na otro pais. Nos a kustumá di lesa di hinkamentu, asta sekuestro na skol...na otro nashon. Ma ora un insidente violento ta sosodé na nos isla trankil, e ta sagudí nos komunidad.

E hinkamentu riba tereno di Komunidad di Skol di Boneiru (KSB) a shòk nos. Nos a spanta ku un alumno ta kòrta otro ku sambèchi. Nos ta alarmá ku un otro hóben ku ta bishitá e mésun skol ku nos yunan, ta presentá ku un machete.

Nos ke sa dikon. Dikon algu asina ta sosodé? Kiku ta rais di e violencia? Pakiku e ta sosodé na nos isla?

Segun direktor di Komunidad di Skol di Boneiru, Rolly Pourier, "Si nos bai den origen di e asunto aki, anto nos ta mira ta un problema sosiológiko ku mester di atenshon di nos komunidad. Ta trata di gruponan di nashon estranhero kontra un grupo di un barío di Boneiru."

Otronan kisas ta mustra riba e influensia ku televishon tin riba nos yunan. Ta un echu ku bes tras bes e pelíkulan na televishon ta pinta violencia komo un medio no solamente efektivu ma asta aseptabel pa trata ku pleitunan, rabia, frustrashon. E héroe di e pelíkula alafin ta logra bati su kontrikante, sea ta ku gòlpi, kuchú, òf arma di kandela. Nos no mester keda strañá ku nos hòbennan, opservando esei riba pantaya tur dia, finalmente ta keda indoktriná pa e filosofia peligroso ei. I unbes e ta siña e lès, e mes ta purba.

Talbes ta e músika ku e generashon hóben ta skucha. Hopi mayor no ta konsiente kiku ta e palabranan di algun kansion òf rèp ta bisa. Nan ta ignorante ku e piesanan ku nan yunan ta skucha ku frekuensia ta promové sèks, droga, spiritismo, i violencia. Nos ta "naif" pa pensa ku e piesanan aki no tin un afekto riba e mentenan impresonabel di nos yunan.

Un otro faktor ku sin duda ta kontribuí na violencia den nos komunidad ta falta di balornan moral. Antes e Dies Mandamentunan tabata grabá den memoria di un gran parti di nos poblashon. Ma kuantu hóben awendia por lista kada un di e Dies Mandamentunan fo'i kabes? I pió, nan ta lamta sin sa kiku ta bon i kiku ta malu.

Nos mes a rechasá stèndèrtan di moralidat. Nos ke ta liber pa hasi loke nos ta haña ta bon. No ta importá nos mas kiku misa òf pastor ta bisa. Asta nos no ke tende kiku nos Kreador ta bisa den Skritura. Nos no mester keda strañá ku nos yunan, siguiendo nos ehèmpel tin e aktitut, "No imponé bo reglanan riba mi! Bo'n tin nada di bisámi!" Ta strañu ku nos ta keda pasmá ku e inmoralidat, kriminalidat, i violencia ku nos komunidad ta eksperensia. Nos por tabata sa ku esei lo ta e konsekuensia ora nos a bandoná balornan moral!

Beibel tambe ta mustra riba un otro kousa di violencia...òf kualke otro delitu, krimen, òf piká. "Ata, for di nasementu kaba mi tabata pekadó--i den piká mi mama a konsibími" (Salmo 51:5). Hende ta hasi piká pasobra nan ta pekadó di naturalesa. Maske un beibi ta parse inosente, den poko tempu, sin haña lès, di mes e ta gaña, bringa, rabia. Pakiku? Pasobra e tin naturalesa di pekadó, i di mes e ta hasi piká. Hesus a bisa, "...fo'i kurason ta sali mal pensamentu, matamentu, kibramentu di matrimonio, fornikashon, ladronisia, testimonio falsu, blasfemia" (Mateo 15:19).

E insidente na KSB ta pone nos tur preokupá di nobo ku nos komunidad ta bai di malu pa pió. Nos ke hasi algu pa trese kambio. Sigur nos mester trata ku e problemanan sosiológiko. Mayornan mester paga mihó tino na e pelikulan i kansionan ku nan yunan ta mira i skucha. Kada un di nos mester evaluá bon ki ehèmpel nos ta duna e generashon hóben; si nos ta biba conforme ku Dios Su stèndèrt di moralidat.

Ma nos no mester ignorá rais di e problema, esta ku hende ta pekadó. Kambio bèrdadero ta kuminsá ku e kurason, di paden bai pafó, no viseversa. Esei ta un kambio ku Dios so por hasi ora bo ta atmití ku bo ta un pekadó, ta meresé kastigu pa bo piká, ta realisá ku Kristu a sufri e kastigu pa bo piká riba krus i ta invita E pa salbabo di e kastigu ei. E so por trese kambio bèrdadero.